

Aningaasaqarnermut Aatsitassanullu  
Naalakkersuisumut

Ulloq: 27. oktober 2015

J.nr.: 01.33.05-00129

**Akilerartarnermut Oqartussaasut ataanni immikkoortortaqarfimmik immikkut suliaqartussamik, aningaasaqarnikkut pinerluuteqartarnerup, ilaatigut ikiaroorartunik niuerniarnermut attuumassuteqartup, paasineqarnissaanik siunertaqartussamik pilersitseqqullugit Naalakkersuisut peqquneqarnissaanik siunnersuut, tamanna pissaaq akileraarusersuinermi annertunerusumik suliniuteqarneq aqqutigalugu, tamatumunnga ilanngullugit nalunaarsuiffiit atortorissaarutillu pioreersut ataatsimoortinnerat, tassuunakkut isertitat pigisallu nalillit inatsisinik unioqqutitsilluni pissarsiaasimasut paasineqarsinnaaqqullugit. UKA 2015/109-mik Inatsisinut Ataatsimiititaliap suliarinninneranut atatillugu apeqqutit:**

UKA 2015-imi imm. 109, akilerartarnermut Oqartussaasut ataanni immikkoortortaqarfimmik immikkut suliaqartussamik pilersitsinissamut tunngassuteqartoq Inatsisinut Ataatsimiititaliamut suliassanngortillugu innersuussutigineqarpoq. Immikkoortumik suliaqarnerminut atatillugu ataatsimiititaliaq makkuninnga maluginiagaqarpoq:

Immikkoortumik siullermeerutaasumik suliarinninnermi akissuteqaamminni Naalakkersuisut imatut paasissutissiipput:

*” Inuit Nunatsinni najugaqartut tamarmik nammineerluni nalunaarsuiffimmik tunngaviatigut tunniussisussaataapput, tassani nalunaarsorneqassallutik ukiumi aningaasarsiat kiisalu aningaasartuutit ilanngaatiqumamat, pigisalli naatsorsorneqarfiannik suliaqartussaataatit, taamaammallu inuit ataasiakkaat sunik pigisaqarnerannut tunngasut Akilerartarnermut Aqutsisoqarfiup nalunaarsugaatiqinngilai. Taamaaliortoqassappat inatsisinik allannguisoqartariaqassaaq.”*

Taamaattorli ” Skatteinspektoratimit nalunaarut nr. 45, 11. september 1975-imeersumi” ima allassimasoqarpoq:

*Kalaallit Nunaanni akilerartarnermi inatsimmi § 46, stk. 2 malillugu akilerartussaataasut nammineerlutik nalunaaruteqartussat tamarmik nalunaarutigisussaavaat ukiup aningaasarsiorfiup naanerani pigisamik annertussusiat. Taamatuttaaq ukiup aningaasarsiorfiup aallartinnerani pigisat annertussusiat nalunaarutigineqartussaavoq tamanna siusinnerusukkat pisimanngippat.*

*Taamaattorli § 114-imi tunngaveqartumik aalajangerneqarsimavoq pigisat taamaallaat nammineerluni nalunaarsuinermi ilanngunneqassasut aningaasarsiat B-t tamarmiusut B-nit akileraarteqartussaangitsut qaangersimappatigit. Akileraartarnermili pisortaasut kingusinnerusukkut piumasarisinnaavaat pigisat suulluunniit nalunaarutigineqarnissaat, tamanna pisariaqartutut isigineqarmat.*

*Pigisat suulluunniit tamarmik nalunaarutigineqassapput apeqquutiginaq pigisaq Kalaallit Nunaanni, Danmarkimi imaluunniit nunami allami inissisimanersoq. Taamaattorli Kalaallit Nunaanni akileraartarnermi inatsimmi § 3, stk. 1, nr. 5 aamma 6 tunngavigalugu killilimmik akileraartussaataasut taamaallaat nalunaarutigisussaavaat pigisatik il.il. killimmik akileraartussaannerminnut tunngassuteqartut.*

Akileraaruserinermik ingerlatsineq pillugu Inatsisartut inatsisaat nr. 11, 2. november 2006-imeersumi § 17, imm. 2 imatut aalajangersaavoq:

*” Imm. 2. Aammattaaq nammineerluni nalunaarsuut akileraartussaataasup ukiup aningaasarsiorfiup naanerani, aammalu siornatigit nammineerluni nalunaarsuutaasimasumi takuneqarsinnaangippat ukiup aningaasarsiorfiup aallartinnerani pigisaanut tunngatillugu paasissutissanik imaqassaaq. Pigisat nalunaarutigineqassapput, taakku nul-imit anneruppata minneruppataluunniit, aammalu pigisat akiitsullu Naalakkersuisut aalajangersaanerattut immikkut ersersillugit nalunaarutigineqassallutik.”*

Aalajangersakkamut nassuiaatini imatut allassimasoqarpoq:

*” Imm. 2-mut. Akileraartartup pisuussutini pillugit nammineq nalunaarsuinermi siusinnerusukkut ilanngussimanngippagit nammineq nalunaarsuinermit ilaassapput akileraartartup ukiup naanerani aammalu aallartinnerani pisuussutini pillugit nalunaarsussavai. Pisuussutit sinneqarpata amigarpataluunniit, Naalakkersuisut aalajangersagai malillugit pigisanut akiitsunullu immikkoortiterlugit nammineerluni nalunaarsuiffimmi nalunaarsorneqassapput.*

Tamanna tunngavigalugu apeqquutit uku akissutisinissaat ataatsimiititaliamit kissaatigineqarpoq:

1. Pigisat naatsorsorneqarfiannik suliaqartussaataanissaq Naalakkersuisut paasinninnerat malillugu suli pisariaqanngila?
2. Inuit ataasiakkaat pigisat naatsorneqarfiannik suliaqartussaataassappata suli Naalakkersuisut paasinninnerat malillugu inatsisinik allannguisoqartariaqassava?
3. Naalakkersuisut paasinninnerat malillugu inuit ataasiakkaat sunik pigisaqarnerannut tunngasut Akileraartarnermut Aqutsisoqarfiup nalunaarsugaatigai? Taamaattoqarpat nalunaarsuiffik sunik imaqarpa?

Immikkoortumik siullermeerutaasumik suliarinninnermi akissuteqaamminni Naalakkersuisut imatut paasissutissiipput:

*” Taamaattumik Naalakkersuisut isumaqarput aningaasarsiornikkut pinerlunniarnermik akiuini-arluni immikkoortortaqaqfimmik immikkut suliaqartussamik pilersitsinissamat aningaasartuu-taasussat taassuma sulineratigut angusarineqarumaartussanut naapertuunnavianngitsut.”*

4. Immikkoortortamik immikkut ittumik pilersitsineq qanoq akeqarnissaa Naalakkersuisunit ilimagineqarpa?
5. Missinguineq taanna Naalakkersuisunit sumik tunngaveqartinneqarpa?
6. Immikkoortortap pineqartup qanoq annertutigisumik iluanaarutaanissaa Naalakkersuisunit ilimagineqarpa?
7. Missinguineq taanna Naalakkersuisunit sumik tunngaveqartinneqarpa?

Ullumikkut pisortani arlalinnik nalunaarsuiffeqarpoq pigisanut annertuumik naleqartunut piginnittuuneq pillugu nalunaarsuiffiusunik, tassani aamma eqqartuussivikkoortumik nalunaarsuivik qamutillu motorillit pillugit nalunaarsuivik.

Qamutininik motorilinnik, qamutininik kalusiuttakkanik, usisaatinik peertakkanik, qamuterallannik (snescooter), traktorinik kiisalu sakkunik motorilinnik piginnittuussuseq qamutininik motorilinnut nalunaarsuivimmi nalunaarsorneqartarput. Nalunaarsuinermit atatillugu suussuseq, merqi/type kiisalu ukioq pilersitaaffik nalunaarsorneqartarput. Paasissutissat taakku qamutip motorillip qanoq naleqarnera pillugu pitsaasumik ersersitsisuusinnaapput.

Eqqartuussivikkoortumik nalunaarsuisarneraq ullumikkut qularnaveeqqusiisarneq pillugu 10. Maj 1967-imit Kalaallit Nunaannut inatsit (Lov nr. 154, af 10. Maj 1967 om pant (for Grønland)) malillugu pisarpoq. Inatsit 1979-imi kiisalu 1988-imi allanngortinneqarpoq. Eqqartuussivikkoortumik nalunaarsuiffimmi pigisanut aalaakkaasunut, pialunnullu piginnittuussuseq nalunaarsorneqartarpoq, tamanna pigisap tuneqqinneqarnissaanut illersorneqarnissaq siunertaralugu. Pigisamat piginnittuussutsip eqqartuussivikkoortumik nalunaarsorneqarnera piginnaatitaaffiuvoq pisussaataaffiunani. Pisiarisimasamilli tuniseqqinnermi inuup allap ajunngitsumik isumaqarluni pisisup pisinnaatitaaffisigut illersorneqarnissaanik siunertalimmik eqqartuussivikkoortulugu nalunaarsuinerummat, pigisamik tunniussinnermi eqqartuussivikkoortulugu nalunaarsuinerup pisarnera nalinginnaasuuvoq.

Pigisap suup nalunaarsuinermi pineqarnera, kia tunisisuunera, pisisoq tunisinermilu akip qanoq annertutiginera nalunaarsuiffimmi ersipput. Pigisap atorlugu qularnaveeqqusiisoqarpat, tamanna assersuutigalugu pigisamat aningaasaliissuteqarniarluni aningaasanik taarsigassarsiniarnermi, pigisap qularnaveeqqutitut nalunaarsorneqartarpoq. Tamatuma nassataraa pigisap qanoq aningaasalersugaanera eqqartuussivikkoortulugu nalunaarsuiffimmi siumut takuneqakannersinnaammat.

8. Akileraartarnermut Qullersaqarfik inuit ataasiakkaat pigisaparnikkut inissisimanerat pillugu qulaajarniarlugu qanoq annertutigisumik pisortat nalunaarsuiffinik atuiva?

9. Akileraartarnermut Qullersaqarfiup qanoq annertutigisumik paasissutissat taakku inuup akileraaruseriffimmut nammineerluni nalunaarsugaanut sanillersuuttarpai?
10. Akileraartarnermut Qullersaqarfiup Politimesteqarfiullu suleqatigiinneranni pigisat nalillit naatsorsorneqarnerinik pisimasinnaasunik paasissutissalluunniit allat attuumassuteqartut akileraaruseriffimmut nammineerluni nalunaarsukkatigut Akileraartarnermut Qullersaqarfimmut tiguneqartut qanoq annertutigisumik agguaasseqatigiissutigineqartarpat?
11. Aaqqissuussilluni ingerlatanik assigiinngitsunik annertunerusumik ataatsimut ingerlaqatigiisitsilernikkut Akileraartarnermut Qullersaqarfiup maannakkut aaqqissuussilluni ingerlataasa allanik immikkoortunik ilaartorneqartariaqarnissaata pisariaqalersinnaanera Naalakkersuisunit ilimagineqarpa?
12. Annertusaanerup pisinnaasup qanoq akeqarnissaa Naalakkersuisunit ilimagineqarpa?
13. Tamatuma qanoq aningaasalersorneqarsinnaanera pillugu Naalakkersuisut siunnersuutissaqarpat?

## **Inussiarnersumik**

Anders Olsen  
Inatsisinut Ataatsimiititaliap Siulittaasua